

समे — 12:25

<><><><><><>

PM-DGP, IGP

प्रधानमंत्री नरेन्द्र मोदी होर पुलस महानिदेशकें ते पुलस महानिरक्षकें कुल भारती सम्मेलन च शिरकत कीगन जेहड़ी अज्जै थमां भुवनेश्वर, ओडिशा च शुरू होआ'रदी ऐते 2 दिन चलोग। गृहमंत्री अमित शाह होरें कल त्रै रोजा सम्मेलन दा शुभारंभ कीता हा। इस सम्मेलन दा आयोजन इक ऐसा मंच उपलब्ध कराने दे मकसद कन्नै कीता जा'रदा ऐ जित्थें पुलस ते सुरक्षा विभाग दे आला अधिकारी राश्ट्री सुरक्षा कन्ने जुड़े दे मुद्दें पर चर्चा ते बचार सांझा करी सकन। इस मलाटी च मता जोर राश्ट्री सुरक्षा कन्ने जुड़े दे गंभीर पैहलू, आतंकवाद, वामपंथी अतिवाद, तटीय सुरक्षा, नमें अपराधिक कनून ते नशाखोरी पर पाया जाग। विरली सेवा आस्तै प्रैजीडेंट पुलस मैडल बी इस सम्मेलन दरान दित्ते जांगन। प्रधानमंत्री कार्यालय नै इक ब्यान च आखेआ ऐ जे मोदी होर म्हेशां गै सम्मेलन च गैहरी रूचि दस्सी ऐ जेह्दे च खुले तौर पर अनोपचारिक तरीके चर्चा करियै नमें बचार सामने ओंदे न। राश्ट्री सुरक्षा सलाहकार अजीत डोभाल ते प्रधानमंत्री हुंदे सचिव पी.के.मिश्रा होर मुख्त तौर पर इस सम्मेलन च शामिल होंगन। प्रधानमंत्री होरें जंदी संजा 3 दिनें ओडिशा दे दौरे आस्तै भुवनेश्वर पुज्जे हे। भुवनेश्वर पुज्जने मगरा प्रधानमंत्री होरें बीजू पटनायक अंतराश्ट्रीय हवाई अड्डे कोल इक जनसभा गी संबोधत कीता। इस दरान हवाई अड्डे थमां राजीवन तोड़ी रोड शो दा आयोजन बी कीता गेआ।

<><><><><><>

Textile

केन्द्रीय कपड़ा राज्य मंत्री पबित्रा मागरिटा होरें गलाया ऐ जे कपड़ा उद्योग च महिलाएं दी भागीदारी च बाद्धा होआ ऐ। कल नमीं दिल्ली च इक पत्रकार सम्मेलन गी संबोधत करदे होई मंत्री होरें दस्सेआ जे 3 लक्ख 60 ज्हार थमां मतिएं महिलाएं सरकार दी समर्थ स्कीमै थमां लाह लैता ऐ। एह पैहज कपड़ा उद्योग च कौशल विकास ते रोजगार देने लेई शुरू कीती गेई ऐ। मंत्री होरें दस्सेआ जे इस योजना तैहत 88 फीसदी महिलाएं लाह हासल करा'रदियां न। उनें गलाया जे कपड़ा सेक्टर, राई-बाई क्षेत्र मगरा दूआ सब्बने शा बड्डा क्षेत्र ऐ जेहड़ा

तकरीबन 4.5 करोड़ लोकें गी रोजगार देआ'रदा ऐ ते 2030 तगर एह गिनतरी 10 करोड़ तगर पुज्जी जाग।

<><><><><><>

ADB

केन्द्र ते एशियाई बैंकें एडीबी नै बागवानी करसानें गी प्रमाणित रोग मुक्त रापण सामग्री तगर पुज्जत च सुधार लेई 93 मिलियन अमरीकी डॉलर दे लोन समझौते उपर दस्तखत कीते न। एहदे कन्नै फसल दी पैदावार, म्यार ते जलवायु प्रभावेँ उपर असर पौग। भारत दे स्वच्छ सयंत्र निर्माण कार्यक्रम लेई लोन समझौते ते उपर आर्थिक मामले दे विभाग च जायंट सैक्रेटरी जूही मुखर्जी ते एडीबी दे भारत निवासी मिशन दे प्रभारी अधिकारी कार्दवेई येओ होरेँ दस्तखत कीते।

<><><><><><>

J&K Termination

जम्मू कश्मीर दे उपराज्यपाल मनोज सिन्हा होरेँ कल दऊं सरकारी मलाजमें गी उंदे आतंकिणं सरबंधे करी नौकरी थमां बर्खास्त करी दित्ता। उपराज्यपाल होरेँ संविधान दी धारा 311(2-सी) तैहत एह फैसला लेंदे होई किशतवाड़ जिले दे स्कूल शिक्षक जाकिर अब्बास ते कुलगाम जिले दे सेहत विभाग च फार्मसिस्ट अब्दुल रहमान नायक गी नौकरी थमां बर्खास्त करी दित्ता। अधिकारिणं दस्सेआ जे एह कारवाई इक जांच मगरा कीती गेई जेहदे च एह तस्दीक कीती गेदी ही जे इनेँ दौपेँ मलाजमें दे आतंकवादी संगठनेँ कन्नै सरबंध न। अब्दुल रहमान नाइक दे आतंकी संगठन हिबुल मुजाहिद्दीन कन्नै सरबंधेँ दी पुष्टि होई ऐ ते 2021 च गुलाम हुसैन लोन दी हत्या दे मामले च बी ओहदी शमूलियत ही। तोआई अलीगढ़ मुस्लिम यूनिवर्सिटी थमां डिग्री हासल करने आले जाकिर अब्बार गी 2020 च हिबुल मुजाहिद्दीन दे आतंकिणं गी पनाह ते उंदी मदद करने दे आरोप च गिरफ्तार कीता गेआ ऐ। खुफिया एजेंसिणं मूजब जेले च रौहदे होई बी अब्बास करटरपंथी गतिविधिणं च मुल्लवस रेआ।

<><><><><><>

Poonch Road

जम्मू कश्मीर च बड़े मते सामरिक महत्व आली 168 किलोमीटर लम्बी अखनूर—पुंछ राष्ट्रीय जरनैली शिड़क परियोजना दा तकरीबन 50 फीसदी कम्म सबूरा करी लैता गेदा ऐ। कल संसद च इक सुआलै दा परता दिंदे होई रक्षा राज्य मंत्री संजय सेठ होरें दस्सेआ जे जरनैली शिड़के आली इस पूरी परियोजना दी लम्बाई कुल 220 किलोमीटर ऐ ते इसी सीमा सड़क संगठन बीआरओ ते राष्ट्री जरनैली शिड़के ते ढांचागत विकास सरबंधी कारपोरेशन एनएचआई डीसीएल आस्सेआ तोड़ चाढ़ेआ जा'रदा ऐ। अखनूर ते पुंछ दे बश्कार आले 168 किलोमीटर हिस्से दा प्रबंधन बीआरओ आस्सेआ कीता जा करदा ऐ ते एह्दे शा 83 किलोमीटर दा कम्म सबूरा करी दित्ता गेआ ऐ। इस पूरे हिस्से च 4.85 किलोमीटर लम्बाई आलियां 4 सुरंगां न ते इसी 2025 ते 2027 बश्कार मीहलेवार ढंगै कन्नै सबूरा कीता जाग।

<><><><><><>

Jammu Police

जम्मू कश्मीर नै कल पुलस सुप्रीटेंडेंट इरशाद एच.राथर हुंदे नेतृत्व च अरनिया दे बन्ने कन्नै लगदे त्रैवे इलाकें च इक जनसभा दा आयोजन कीता। जिला पुलस जम्मू नै इक सोशल मीडिया पोस्ट च दस्सेआ जे बैठक च यातायात लोआंगना, नशीले पदार्थ दे दुरुप्योग वीडिजी भर्थी ते होर दुए मसलें उप्पर बचार बमर्श कीता गेआ। पुलस नै इस दरान क्षेत्रीय सुरक्षा ते सामुदायिक सैह्योग बधाने दी अपनी वचनबद्धता गी फही पक्का कीता।

<><><><><><>

Asia Cup

अंडर-19 एशिया कप क्रिकेट च भारत अपने शुरूआती मकाबले च पाकिस्तान कन्नै मैच खेड़डा'रदा ऐ। दुबई अंतर्राष्ट्रीय स्टेडियम च खेड़डेआ जा'रदा एह् मैच बडलै साढ़े 10 बजे शुरू होआ। पाकिस्तान नै टॉस जित्तियै पैहली बल्लेबाजी दा फैसला कीता। खीरी सूचना थोने तगर 26 ओवरें च पाकिस्तान नै बिजन कुसै विकट दे नुक्सान दे 126 रंज बनाए हे।

<><><><><><>

Weather

मौसम विभाग नै अज्ज थमां जम्मू कश्मीर च अगले दऊं दिनें तगर हल्की बरखा ते बर्फबारी दी संभावना जताई ऐ। तोआई कल जम्मू दा बद्धोबद्ध तापमान 24.4 डिग्री सैल्सियस ते घटोघट तापमान 10.1 डिग्री सैल्सियस दर्ज कीता गेआ ऐ।

<><><><><><>